

四庫全書

集部

欽定四庫全書

集部

中州名賢文表卷二十三

詳校官中書臣瞿照

助教臣常循覆勘

總校官庶吉士臣朱 鈐

校對官編修臣盧 燧

謄錄監生臣李世麟

欽定四庫全書

中州名賢文表卷二十三

明 劉昌 編

王文定公

賦

弔廉將軍墓賦

并序

三代而下功利之說興人臣擅恃功能鮮以禮讓為國者觀頗挾勲內忿怙居人下加諸彼不淺相如引車避嫌有犯無校蓋出天稟粹然處之為非艱至頗聞急先

一言遽能握髮數罪受責門庭在將臣為實難若將軍者可謂不遠而復得無祇悔之義哉遂摛文以弔其辭

曰

涉滹沱而北驚兮過常山之故城何高丘之突兀兮鬱  
劍氣之崢嶸野人指而告予曰此廉將軍之封陵也人  
與骨而塵朽兮義於粲乎日星遂陳辭而弔古今命僕  
夫以停征嗚呼休哉昔伯禹之所以聖兮始不伐而不  
矜秦誓之所以經兮善悔過而胥盟觀戰國之多士兮

依稀猶三代之英惟功利之時尚兮天理有時而蔽明  
能不遠而復初兮其惟趙之廉卿方國都之中立兮資  
內附而兵精頗分閫而秉鉞兮騰茂實而蜚英聲梁從  
隨而楚讐兮燕弭伏而齊并時有以卜將軍之意氣兮  
殆雷動而滿盈遽相臣之出右兮何發言之盈庭幾肉  
餒而食甘兮奮兩虎之必爭及聆急難之一言兮輒弭  
耳而服膺復頓顙而悔過兮折節負贖罪之荆在引車  
而不必多兮將臣及此所以為古今之難能也逮漢起

而帝稱兮禮飲至而策勲何諸將之失度兮至擊柱而  
紛紜安得將軍從容為一言兮解馭繒屠狗之禁彼臣  
澹之毫釐兮加充渾之貪蒙吃吳平於帝前兮互滔天  
而為己功安得將軍滌易其褊薄兮俾無成而有終嗟  
鄂國之列公兮挾勲勞而凌帝宗縱私忿而無忌兮一  
墮夫臣子之恭安得將軍北面而同列兮以中和之氣  
銷悍戾於未然之胸也雖哀之而不能鑒兮文空言其  
奚庸繁慨慕其耿光兮日三省乎微躬蕩吾伯夷之隘

兮擴乎穆公之容希前賢而同升兮附驥尾而竭忠雖  
斷斷而無它兮庶幾凜凜德讓君子之風衝山煙而暮  
去撫鳴劔兮增雄

熙春阮賦 并序

玄暉上人得隆德故閣餘材斷而為阮因以熙春目之  
亦文殊之義也至元戊寅春同甯尹端甫劉御史叔謙  
趙太博彥伯坐心遠軒師為鼓綠水悲風二曲清越悲  
壯坐客感歎興亡有愴然於懷者師請予賦之其辭曰

天新雨風日妍心與閒會境趣靜便拉曠懷之逸士過  
雪庵之老禪斂袂危坐添鑪炷箋於是出桂阮調素絃  
控肱月而當抱撫筠柱之橫駢師曰茲熙春之斷餘偶  
緣之而清圓者也遂鼓一再行清越悲壯如泉咽冰底  
風行樾間儵儵兮欲斷而復作淙淙兮似漱而還潏鏗  
爾擿銅丸之韻淒兮聆高樹之蟬又如游士騁說劍歌  
去燕何辭氣之從橫激太清而沈羽淵客乃呀然而驚  
慘然而悲信乎物之感人有不期然而然者想老徽之



般樂盪侈魄以無前厭華陽之湫隘敞樓居而致仙海  
鰲首拊金鵬翼騫鬱鼎蓮之香霧鎖月殿之嬋娟蔭千  
秋之歌舞壽良岳而不騫俄龍移而鼎去繼金亡而閭  
遷殆露盤之聲折悵秋風而涕潛興廢一瞬兩朝百年  
委繁華於野草鎖莽苑之荒煙吐此木之何幸遇幽人  
之達觀納彌虛於芥子寓餘哀於七彈猶足以舞魚龍  
於海曲洗亡國之愁顏也嗚呼噫嘻向之使人凜而悲  
者物詎能動於人哉人之哀樂妄為物之所牽不知太

虛寥寥既寂而玄唯此理之嘿識何繁華廢興之足歎  
師曰子其為我賦之吾欲秋月當戶松風滿軒寫仲容  
之別操合清商而洞宣使雲陰蔽空玄鶴下颺走商延  
於濮上掩新聲於師涓也

鶴媒賦

并序

中統二年予在上都掌記中堂客有負青障挾長杖二  
鶴馴於後以廩繼來請問其役曰以鶴取鹿者也嗚呼  
鶴善類也喙雖長不鉤鈎以噬爪雖巨無跡指以攫而

於鹿伏容有伎害其如人之不仁何至元壬午冬與禮部王兄子冕因話及此慨然有感曰今人以智計相傾內險外易者何殊於鶴之取鹿也作鶴媒賦其辭曰

萬物者元氣之盜氣之靈者莫人若也既役物而君之其忍以盜作智而為得計乎如絳鹿草間圖鷓潔地啗紙求蜂葉城網雉盜物矜雄此何足異以智獵愚理固宜然用愚戕愚斯則不仁之極也鶴本善類與物無伎飛翔寥廓仙游之驥教之羽舞已違元性詐以標鹿遂

戕彼命是則鶴之善人則用而險之返有過於機穽也  
鶴了不知鹿終弗悟歲供庖厨皆鶴之故何殊人心內  
險外易以詐假仁顯比陰忌將取彼有則必姑與彼昏  
不知日狎而伍一落其機投足無所誠何異以鶴而媒  
取也吾然後知物之顯暴者既得預而防之愚而深中  
者尤不可玩而侮也示我同志筆而為賦

五言古詩

擬韓子秋懷十一首

出郭行時稼秋風正蕤蕤臨川閱逝波浩浩去不已富  
貴來幾時及此行樂耳把酒對西山坐看秋雲起天矯  
化蛇龍異狀紛莫似世態初不殊儻來安可恃我懷拔  
俗標干霄仰逸軌酒酣歌嗚嗚振衣私自喜

秋風拂庭柯物意自含悴松栢抱貞心表表歲寒地長  
年豈致養易衰匪自恣浩浩一氣中所稟蓋殊鬼人尤  
物之靈要以天爵貴

天運健不息君子戒靡曼讀書下硬寨肌腸充藿飯造

道苦未深紛華非所願秋風動黃鵠千里奚足歎風濤  
北溟鯤變化搏九萬大邦易為仁郁郁文獻半出處貴  
有時莫遣夜鶴怨

攬衣起秋早露氣清凌凌偶書秋懷篇悞筆成蒼蠅吾  
言固不佞未免人屢憎聖域有坦途學步高山陵尋源  
有靈槎臨池弄鯉曾我生恐不偶鄙事從多能

虛室生夜白清露發鶴警空庭海月上愛此良夕永今  
年苦煩歎似值苛政猛盼盼秋風來汲深持短綆

庭菊被焚燎脫禍乃差幸朝來有佳色一笑倚軒屏露  
叢低寒花促織泣暮景呼兒曝羣書趁此秋日炯弊帚  
享千金利途競織梗二者昧所思厥病失坐騁既悟前  
日非敢事子淵請

長夜苦漫漫長空星斗暗商歌南山翁遺愛有餘憾祇  
知享高明曾何恤鬼瞰而我獨於世滋味嚼蠟澹畏途  
足風波汹汹洪水濫濯足尚云可浣纓豈宜暫此身矧  
虛舟敢不慎簡纜天心幸私我書史日與勘庶還浩浩

天未害家儲甌

殘暑不肯退秋陽麗庭軒靜觀消長理警此歲月奔成  
功嘿嘿去天道何曾言斂衣坐一室書帙散我前開卷  
飫至味忘却盤中殮最愛歸去辭雋嚼了一篇作者古  
不少文字浩萬千感君固窮節當年亦辛酸遙持酒一  
瓢同醉東籬邊九原不可作念之終歲年

青竹不耐暑索寞衆葉乾白露下天宇洗此青琅玕風  
枝簌餘潤暗滿佳菊團依依南飛鵲遶枝擇所安感時



賦秋懷古井翻晴瀾我生分已定安用資走丸出門安  
所之呼兒解征鞍

閉門秋月上靜院圍蟲聲幽人掩牕臥一室鑑虛明四  
序倏以周代謝何其誠物華有盛衰天地復虛盈君子  
順所履持身嚴五兵牛羊旦旦伐山木時以榮所慎獨  
處際心蕩韓盧令

離離壠上禾望望日攸好不勤耘籽功秀實應不早西  
風卷黃雲收穫走鄰保荒田棄足惜握之遺其稿致役

貴厥初無為宋人道

寒雀歎

閒庭有遺粒寒雀往還飛盼睐傍無人翔集下疎籬一  
啄復三顧慮為物所窺幽人負暄坐玩之澹忘機一笑  
拂衣起羣鷺向空歸因之感吾生分外非所期富貴倘  
僥倖何殊鳥鷺疑吾儕以義榮先賢有良規

鹿喻

我本麋鹿性出處安自然金鑣非所慕志在長林煙得

遠機竅地食華飲清泉  
呦鳴錫同類甘以辭華軒野兕  
出其側暗蹂山前田農家伺所害  
乃知獸之愆彼兕以計去嘉禾  
芊芊野人居山中數畝事墾劬慮  
為町疇場指鹿乃兕屬雖無獨刃  
心見之惡且逐鹿心素無機澹與  
標枝閑遁跡入幽谷擇音遠人寰  
尚為山中人置疑齒頰間

溪田暮歸

疎林煙火微  
草露溼芒屨  
遲遲歸路長  
清月掛林杪  
依

依南飛鵲幾回驚且繞一枝幸得安誰復睇雲表田家  
固作苦遺安子孫寶彭澤百日令解紱徑歸老我心默  
有契縻爵豈不好違已病交攻飢凍止枯槁躬耕南澗  
垂浩歌樂槃考

昆陽懷古

行役宛葉郊路入昆陽城洹水抱城左蕩滴東南傾川  
原入四顧蟠亘多崗陵城頽削懸崖草深惡鴟鳴嗟爾  
一杯土當此百萬兵莽圖十九年聚此天為阮王者況

不死千騎驚龍騰漢業兆豐沛赤伏此中興創復兩不  
易山川賁雄名東西遙相望盤盤兩神京千年事雲散  
草木含威靈野人無所知城邊事春耕扶犁上廢壘  
畝縱復橫只應懷古士千古愴餘情

為東坡昆  
陽城賦

泛漳篇

并序

予以王事奔命今春環走二千餘里前次漳陰車殆  
馬煩且得目眩髀痛疾遠不能騎舟行東下庶得一  
日之休富覽大川勉卒來事作泛舟篇以見意時至

元辛巳四月十一日也

盤盤魏大名屬縣行且周銷我髀裏肉四月猶綿裘舍  
車出漳陰步上枋頭舟咿啞理雙棹信船下中流清風  
泛微瀾篙師訝當頭豈知河伯意故故為遲留汀花助  
行吟孰取澤畔愁解衣卧篷底穩似畫舫幽駭觀兩岸  
移灣環轉林丘灘回淺能澁波富去自適拍拍風水聲  
雨打空階秋白鳥何處來雪點河之洲前飛如導子翔  
集聲啁啾欽念川上歎晝夜何悠悠宜為智者樂曲折

涵至柔中擅利物功轉漕半九州君看萬斛載掀舞一  
葉浮仍為勉不息能若茲水不行行望沙麓且得一日  
休呼兒覓殘紙題作漳川遊

野河渡

蒼茫劉橋渡南北凡幾過清霜十月交澄湛東流波飲  
馬立水邊照我兩鬢皤行役非所苦傷懷動悲歌三年  
恒山趙彈劾兼拊摩熬熬眼中民力弊差與科不能一  
勺潤慰彼煩與痾顧此衣帶水溉載功實多人而反不

若低首愧野河素餐吾可逃奈此蒼生何

折齒吟二十四韻

吾年未四旬顛髮白勝雪兩眼眩生花一耳或通塞所  
喜牙齒牢未省有殘缺飲食雖壽基齒壯物喜嚙庶幾  
桑榆境健啖延歲月所以馘與餅飢來若刀截今晨具  
盤食輒肉固纖屑一噉出不虞左齒拉而折羣稚慙不  
嬉病妻驚欲絕汝老不自量無故取推搯予云盛則衰  
百醜見兩頰平生好言辭咀嚼出五色文戰怒欲碎醉



飫乾甚決運用勤亦至半百當衰茶

一作歌

時時以舌舐

乍脫覺中熱一落不復生根杈漫枯枿駭若中堅摧闕  
於山口豁自今須慎護作事思妥帖一柔勝百剛有味  
老聃說哈呀動恥念顛倒漱水怯猶勝昌黎公餘者堅  
尚潔既不妨獻歌底用心軌艱齒墮端午前詩裁重午  
節成虧恐有數歌以散憂結

汲冢懷古

丁亥歲三月十八日觀稼西疇遂至伍城抵安釐王

陵下歸作是詩者蓋自江左平後竹書多傳於世余  
憂好奇攻異者讀之恐有致遠汨泥之弊故不得不  
辯云

彌迤伍城郡背水猶陣圖魏陵廢已久磅礴如覆孟草  
樹慘不春穿穴狐狸墟我來登其巔懷古心躊躇憶當  
戰國際安釐亦狂且澤麋被臯比坐為秦人驅敗亡自  
此始保邦何乃疎不知身後藏安用書十車上窺似與  
辛下逮蒼周書零亂竹簡光詭說何紛挐征南辨已詳

多出行怪徒稽古不適正死為毛穎誣其中亟當辨阿  
衡被夷誅孔子修六經亦已防姦污大書一德後薨葬  
開毫都在易最奇法安取理所無茲焉萬世程洋洋真  
聖謨何煩事幽蹟致遠泥所趨長歌望陵去樂過風乎  
雩

擊訓狐

訓狐本惡鳥飛潛林谷間眎夜返為晝聲勢何軒軒矜  
凶聚妖異其氣幾神姦家僮夜得之縛致庭階前目光

爛兩炬狂躍倖一騫羣兒顧之駭四走入席眠我因為  
沈思善惡以氣宣古云鷹隼輩不如鳳與鸞以茲惻愷  
心遠彼凶與殘胡為止我屋夜半呼聲乾女奴前致辭  
此物何足患西家養以久逸飛偶翩翩內疑始冰釋念  
之心稍安緬懷昌黎公心炳陽烏丹彎弧親斃之絕類  
不使蕃揮策碎厥首亦與韓意然長令杖端血著此一  
綫殷比跡孔段笏異世同不刊起視夜何其斗插西南  
天蒸雲變曉黑漠漠來輕寒

望崧吟

至元丙戌長至日追作二十韻

前歲試洛師憶與節齋約同作崧少游心賞為一豁羸  
驂鞭欲前竟為事所却宛循洛水東馬首眺陰壑洪濛  
元氣薄磊落雷雨惡不有此峻極安得雄四岳只緣不  
得登萬象負酬酢諸峰羅六六景氣終慘錯披榛入會  
靈宋離宮名吟倚廢宮角陳公最健者帥可三軍奪空餘陸  
仙興出世說飛墮迷嶺嶠歸尋黑石渡易駟指鞏洛行行  
嘆不勇失此寧復作吾儕貴乘時過慮自羈勒至今有

餘恨夢繞神崧脚盤空轉危磴矯首看飛閣探穴不知  
畏入室不挽葛茲焉即神清洞戶四開闢山人喜余至  
供具為止泊會凌列宿嶺一笑動寥廓

雙廟懷古

鐵輦動地來獵火爐九縣睢陽東南衝江淮國所援蔽  
遮不使前恢復可立見二公明此機死守誓不變雖危  
所保大如蝮螫解腕最難結衆心存歿匪石轉彼蒼昇  
全節誰為落賊便已矣君不忘握爪掌為穿竟能濟中

興淮海了清奠至今忠烈氣皎皎白日貫賀蘭觀成敗  
不飲浮屠箭殺亡計多寡此論誠可辨我來拜遺像凜  
對如生面乞靈激懦衷剴決剛同鍊朔風吹樹聲尚想  
登陴戰暮倚暈月城悲歌淚如霰

苦熱歎四十六韻

效昌  
黎體

祝融駕火蚪頰轡周八裔戰酣西北乾回薄餘暮熾朱  
光沸虞淵大地蒸一氣蒼茫夜色溼酗鬱玄象醉今年  
六月中荼毒逾往歲金晶才始伏燠怒勢此銳炎官張

火傘屏翳揚赤幟四合歌陳來一鼓赫離治天潢影半  
涸星鳥芒欲彗吟風樹葉噤塌翮林鳥墜併兼坎兌權  
不使天地閉王城十萬家燠灼迫一勢乾坤墮熾爇逸  
德駭天吏掩關人事絕藏伏敢口議褰裳起中夜遁夕  
不容寐捫背赭汗流窺井湯泉沸松間有困鶴無夢到  
清唳墻根有腐草螢化光皙皙穿簾入我室照眼驚火  
齊陰蟾遁老魄火鼠騁黠智夜深過我前跳躑翻飲器  
屋古又足蝎伺螫尤謹避簟紋燎炎輝側脅能少憩舉



動體愜熟歛歛氣短細抱冰眠或可揮髮何所濟二年  
容京師身幸置散地雖無束帶勞唯老覺加倍彷徨不  
知曙種髮沐而被四序本平分偏盛誰所致火攻出下  
策不已燔萬類嗟此一世人暍死將何厲此生匪金石  
流鑠吁可畏內熱復自焚衰槁將立至燥惟以靜勝事  
須以義制冰山詎可依煬竈非所緇邈想崑崙巔庭觀  
何偉麗巍然五千仞日月光隱蔽回環十二樓空明澹  
無際水晶作柱礎羣玉絢軒陸天風掠枕席月露溼環

帔瑤臺擁灑靈萬舞發清吹真仙事朝元鸞鳳互駭翳  
閭風接玄圃追陪憶遊戲何年墮塵緣坐想無由詣安  
得萬里風振此垂天翅脫落區中囚高舉尋吾契

虞姬墓

在靈璧縣東三十里虹縣道南  
陰陵山北舊有廟在山上今廢

重腫鮮情人鍾愛獨虞美五年有天下寵幸想無擬一  
朝走陰陵楚歌聞四起君王大事去飲訣共歎歎感君  
伉儷恩死不為漢鬼一坵鳳陽東粉黛見石紀空餘山  
頭草纔歌葉披靡定應月夜魂長遶烏江水

食鱸魚

鱸魚昔人賢我行次吳江秋風時已過滿意尊鱸香初  
非為口腹物異可闕嘗口哆頰重出鱗纖雪爭光背華  
點玳斑或圓或斜方一脊無亂骨食免刺鯁防肉膩勝  
海薊味佳掩河魴燈前不放箸愈噉味愈長張翰為爾  
逝我今赴官忙出處要義在不須論行藏倚裝足朝睡  
且快所欲償夢驚聽吳歌海日方蒼涼

平望道中

今日風色好舟行喜清和吳江抵嘉興遠不百里過解  
衣坐蓬底閒聽吳儂歌大艫從東來帆檣鬱嵯峨云是  
淮海公赴召耽微疴倉皇不少住進棹如飛梭物情忌  
太盛從者不得多尚餘蔽川載意氣隘兩河有懷陶朱  
公霸業到不磨功成委之去敝屣與棄蠡左顧萬金橐  
右顧西施婆可想不可見五湖渺煙波

響板辭

笙篴雜箏琶悲策合蕃唱喧然一堂間餘音胡得抗紅

牙掩自無按拍喜時向響板出新聲激烈極清亮都來  
三齧木手拉若爾壯遠疑啄木禽扣戶何異剝近驚老  
鶴喙頓齒振林壑劃然透空去夜靜秋城柝方能節衆  
音乃見終始作我本幽吟人避喧便澹泊奈何將兩耳  
聽此終日聒君不見陶琴無絃趣有餘子幼鳴歌死哀  
樂

望黃金臺有感

樂生與郭隗擬德非同儕九九乃小數正可訓提孩樂

生復國讐強齊捲輕埃燕昭師事隗竟築黃金臺我思  
賢王心要罄初始懷在昭固至德贊襄誠衆哉卧龍以  
力食躬耕亦堪哀昭烈昧三顧孔明甘草萊一語萬代  
譽正獨龐公開鳳凰巢千仞一舉出九垓翱翔覽德下  
千年能幾來揀時不易得況復管樂才毅然好賢心無  
為古所咤

壯士吟題郝奉使所書手卷

使節駐淮海人望兩好熙宋人足變詐觀望占成虧不

知破武事中伏混一機壯士死則已不死將有為宋瑒  
凜風概天馬不受羈拘隔一館間激之見連雞事久變  
乃生勢去心恫疑奄奄十六年憔悴甘湘纍內閨既首  
鼠外侮宜紛披盛氣屈使降壯心終不移晚柱欲碎首  
忍見王人微松嚴操愈厲草綠秋更萋蕭爽隱霧豹脫  
畧觸藩羝老賊主一殺幽憤將何施庭芝一援手所惜  
良不貲兵交使其間天理或可期子卿才屬國所報亦  
以卑至今郎山塚突兀空蟠螭兩行清汝帖只有老天

知

題焦節婦卷後

焦氏有賢女姿稟與衆殊既笄樂貧素出嫁南征夫一朝聞卧病尋訪邊之隅怙恃力眷挽在妾夫何如竟能遂初志扶喪歸里閭朝昏事蠶織恭侍舅與姑百年終孝養葬祭何勤劬拊畜兩孤幼嫁娶禮與俱孫門固衰謝賴一貞節扶夫婦人倫始因之變時污一端青穀信至死誓不渝采詩論國風彤管宜沾濡誰謂閭閻間凜



此風烈娵猗猗谷蘭馨落落青松孤豈惟表門闕抑備  
太史書達卿昧平生容齋文可娛美節觀東州亦用播  
友于清風振孤標讀者宜嘻歎

送許澹齋提舉隆興學校

我初入玉堂喜識澹齋面忠翁兩朝士極口為稱羨子  
遠東嘉人文綵金百煉妙年登巍科巧宦歷幾徧風儀  
聳四筵目光雙炯電前年來京師得遂依劉願校書天  
祿閣音吐見雄辨長河瀉建瓴灑灑江左傳三釜固祿

微一官爭鶚薦行李日羈栖猶是多士冠今來得美除  
提舉江西彥在吳列朝行客燕領詞翰洪都儘經學文  
藝業多擅好將鑄顏手主善志無倦習俗與命脈風雅  
為一變江煙送行舟瀟灑離亭餞清吟代驪歌別思空  
眷戀依依鄉國情去逐南飛鴈我老歸未得松菊夢秋  
澗衣冠拱清朝祭馬珠會弁自慚老無能零落秋風扇  
君行重感慨黽勉磨鐵硯長江控高閣百丈驚井幹梅  
花散春妍蒼煙開禹甸江山有清眺風月興不淺南昌

地卑溼衆流爭湊行去年水為災孤城江四轉兒童化  
魚鱉萬竈產龜鼃慨然為開陳此事豈小便一鍤濬東  
湖澄江靜如練澹齋素有為肯遣空懷卷

七言古詩

金馬門行

贖董參謀彥  
才之元帥府

十年金馬門中容萬里風雲橫上策貂蟬要自出兜鍪  
擎舟渡江江水窄新豐樹色繞千官一片丹心懸魏闕  
洞庭白波木葉下千騎臨江思飲馬堂堂大帥晉龍驤

聲振南陲無呂賈止則如山戰則克更著君侯參幕畫  
淮陰何止一軍驚滿眼旌麾動秋色萬竈連營楚戍煙  
一樽回首銅駝陌功名年少貴力取行與諸兄垂竹帛  
蹇予久事筆研間天東倦客未能還夢回破屋見星斗  
商聲夜半歌南山虛名不到麟閣上白日能饑苜蓿槃  
何如乘此長風去濁浪吹破東南天

銅方爵歌

為翟器  
之賦

荒陵盤盤枕山垆石麟埋沒秋草平陰燐夜出金作聲

牧兒走避羣雉驚佳城一朝見白日神物還從野人得  
勒銘壬子歲幾周考究古書猶可識篆文鐫刻非近世  
周鼎殷盤迺倫擬兩柱作一作具形四趾垂象齒雷章

繞腹隱觚稜老鳳喙長驚下墜土花繡澁不敢蝕翻成  
翠羽丹砂紫我觀三代制飲器多圓體吐爾形模方劂  
刻殆神鬼秋菌春蒲非可比物之隱顯固有數流落君  
家得所止士雖好尚具眼少博雅如卿古君子補亡呂  
氏尤取重元氣淋漓開太始君不見達人大觀者今古

一昏曉人生極壽百歲止作計千年意何藐我歌君試  
聽古人誰盡了九原不復作此器君當寶一笑尊前為  
傾倒

短歌行山中寒食作

是日遊李  
馬二墳

花枝入簾晴晝長游絲翻空網春光一聲金縷酒滿觴  
聽予短歌踏春陽雲澹風清日將午信馬東城歷煙隴  
人家野祭須墓頭白白紅紅滿原圃饑鶯欲下影婆娑  
不待墻間徹盤俎陂陵高下麥青青貴賤賢愚同一土

況茲百歲忽如寄過眼浮榮誰比數古人感此由重論  
力取功名照千古東崗畸人說隴西攀附雲龍總風虎  
鉅株枝散勢莫依瀟索荒邱穴鼯鼠豈期健婦持戶門  
一片豐碑論世譜林宗不作蔡邕死旌紀紛紜爭媚媿  
銀罌酒暖藉草坐滿引一杯私自語吾家先壠在衛南  
老柏如林百年許起身耒耜世有澤嗣及先君擬掀舉  
生平抱負奈數奇賈志下泉良獨苦悲纏風樹逾一紀  
業在青箱恨難杼伐柯有斧晚不遠負荷至予尤莫取

一官羈勒晉州城  
踽望南天淚如雨

沙堤行

君不見漢家日月四百載  
比隆三代追唐姚經綸  
帝業頗多士規為始自曹  
與蕭又不見丙與魏孝宣  
中興賴宏濟似慚變理化  
權衡重以文儒緣吏事羽  
毛千古動雲霄黃閣清風  
兩無愧潭潭政府中書堂  
朝廷思治具畢張歷觀至  
元中統間諸公翱翔佐時  
昌相君繼踵參幕畫快決  
不數陳元康況今炎風朔  
雪混一統軍國庶



務何穰穰一朝鳴佩見獨步恩波鳳沼翻晴光小心清  
慎富籌策人望翕爾稱賢良房謀古推帷幄傑匪以杜  
斷疇能將璣旋衡幹日萬計夙夜密勿心靡違愛君南  
選儘公允要使四海桃李俱芬芳我常叩君見餘蘊選  
進久已歸鞶囊柳陰大道沙堤長迤邐遠竝宮圍傍錯  
金輕軟襯珂馬火城前導光煌煌行人走避歎禮絕焜  
耀赫奕何非常相君報國有能事澤民三代君虞唐火  
城沙堤誠足當况茲三陽排凝出九地君子道長羣陰

亡惜哉時乎不易得為君一言陳斐狂蕭曹開濟固云  
重丙魏論思詎可忘

羽林萬騎歌 并引

至元丙子歲立春后三日醉入奉御宅明日酒惡隱  
几坐殆不能為懷遂取通鑑閱唐明皇帝清宮事蹟  
作古樂府一章號曰羽林萬騎歌書示表弟韓從益  
且浮大白數四覺酒氣拂拂從指間出去矣其辭曰  
韋娘雞晨遵簞武壯雛啄李求太女履霜得冰忽深戒

禍始房陵帝私語神龍殿前虹貫日王氣龍池濯煙縷  
羽林萬騎驍且雄守扼內外生陰風韜裁文豹虎衣炳  
扼腕久弗諸韋容潞州別駕眼橫電虬髯英姿真太宗  
暗中結納許清禁繼以幽求玄禮仙鳧忠玄武門前聽  
二鼓散亂天星隕如雨平明一掃妖氛空相王已是玄  
真主東城瑞靄朝日鮮五王甲第臨天淵三郎歸來龍  
在沼晴波翠灑終南煙開元隆平此張本煙火萬里春

熙然誰圖勇斷蛾眉劔翻作環兒竝轡鞭

畫家有王  
環並轡圖

謁蘇墳

在汝州陝縣釣臺鄉峨眉山前

神嵩崩騰萬馬東  
汝流西來橫玉虹  
山川秀潤不少悴  
知有峨眉老仙宅  
其中先生立朝有大節  
南游天使完其忠  
胸中英氣蟠不盡  
餘蘊散作文章宗天章  
昭回爛雲漢下探萬古英  
靈空前年西堂覩先生之真像  
今年此山拜先生之堂  
封嗟予何者有此幸  
青藜得照龍淵宮  
汝陽樓上重回首  
安得追逐逸駕攀高風  
滌濯固陋開顓蒙  
公雖僵卧其猶龍

虎牢關行

至元三年夏六月子與總管陳慶甫考試洛陽東還汴京道出其下

鞏原北望河洛郊嵩印東走脊尾高憶初洪水勢方割  
湯湯北匯深淵壕千年水去兩崖出天險東阨開成臯  
中原失鹿在所逐河山戰氣秋蕭騷當年劉項儘勍敵  
阮生猶為歡非豪竇王掎角更可笑如蛾赴燎其能逃  
秋煙古戍深黃蒿狐狸夜上關頭嗥空餘千古荒城路  
輸與行人說爾曹

商鼎歌

并序

燕士張君父季讀書不求官治生不務富稍有贏餘  
即購求古器書畫為事故其家藏三代已來鼎彝敦  
卣及前賢法書名畫甚富素負藻識遇夫奇妙不惜  
資貨期於必得既得之傳觀借玩初不吝惜暇則明  
牕棊几展布陳列迺沾沾而喜曰古人不作古意尚  
在三代之英精諸賢之純粹今吾何修一朝盡得而  
有之其稽古尚友之誠靜觀適懷之樂於斯時也中  
心充實意得所寓回視晉楚之富趙孟之貴不啻如

雲煙之過目遇佳客踵門焚香煑茗盡發秘藏為序  
說家數評論其優劣雍容文雅有都城古家風味於  
足稱也仙露寺僧寶藏商鼎有年不惜百金易而得  
之愛玩不足復求館閣諸名勝詩詠喜為序其平生  
澹癖仍以古調歌之其辭曰

維商賢君六七作禮重烝嘗制於鑠只緣近古俗忠厚  
象形作器窮精鑿敦彛鍾鼎賜臣工重比謚贈縻天爵  
當時文獻不足徵故家餘俗歸寥索蒼銅不逐太社亡

千古流傳誇灑盪供佛牀頭夜壑深物歸所好得真托  
張君稽古負精識入手摩挲三歎息兩耳高撐足拱三  
六乳附觚何的歷饕餮繞腹雜雷紋紫翠英英悵猶溼  
細觀款識商父丁崑玉南金非所惜平生澹癖心不足  
此日大嚼情暢適模形遠紹考古圖發揮假手詞人筆  
君不見當年莘叟負謁湯高宗彤祭雉鬲黃金塗耳  
玉鉉光此事傳聞已陳迹一朝悅墮三毫間神明之器  
今日擊或裊沈煙讀誥盤或挹殷谿煮巖石尚友直探



三代英平生閱古心方畢

憫雨行

至元十七年夏四月二十四日自東鹿縣入深澤午  
憩西河鄉錄父老語車中足成此詩時所在祈雨

旱蟲食桑桑葉無穀不出壟麥欲枯人間四月號清潤  
物色慘悴幾焚如車前田畷向予說半歲無雨曾霑濡  
春蠶滿箔弃欲盡鋤戶趁熟多空廬社翁致禱略不神  
盼盼一雨何時蘇嘗聞古人遇災懼牲幣徧走山川雲

外修政務內自責念及女謁并包苴昨朝冠蓋稱勸使  
田務督責湏勤劬農非耕稼何所事勸至無勸將何趨  
一和繆盪良有謂螭蜥滿盎真無辜我初聞言顏已厚  
食不下咽心為瘡憑軾歸時長歎息欲對畸人意先屈  
因思漢相問行悖變和恐是三公職近年氣運例險食  
忍待湏臾莫倉猝驅車疾去指前途落日蒼茫下喬木

宣和寶墨歌

贈顏提  
點仲復

宣和殿深春晝長老徽宸翰昭回光墨卿入奏少許可

追逐五李參三張猶卑古法出新意萬笏細搗和龍香  
宮鴉借色翻朝日三十六宮香霧溼鳳飛龍舞九天來  
雙影盤盤落玄壁流傳人間今幾春顏公得之知所珍  
有時一勺試曹溪翠研靈靄看玄雲錦囊舉世為寶玩  
何知尤物反玩人以茲過客目有屬重似連壁輕埃塵  
龐眉書客秋澗子老不道進技乃伸右軍筆端有陣法  
需此甲盾方通神作謔一笑師應聞

聚星鳳池硯歌



宋賓客宏道出端研示予背有七眼題曰星聚鳳池  
其狀皆作人目平堅蓋未嘗見也先生喜翰墨又目  
疾新愈即得此硯豈尤物有歸將為文字之祥耶將  
洞發神光增雙明於桑榆之境耶喜為作詩以歌之  
其辭曰

硯之同功甲與鋌試之敵場惟利堅其或返是奚用焉  
嗚呼此硯從何傳墨華猶帶紅雲鮮景星會弁古有泉  
鳳池春漲光流淵松風瑟瑟聽磨研君看淚眼真茫然

斲手愛惜猶珠蟻江山秀發駭一世乃令碧眼開癯仙  
先生神光還舊觀皎如明月澄秋煙潛心雖澹開有兆  
不爾此物胡為前硯園喚起襄陽米走虺驚蛇見醉顛

讀五代史記作古樂府五首

楊柳枝辭

唐昭宗天復三年梁王溫辭歸鎮留宴壽春殿又餞  
於延喜樓上臨軒泣別因賜楊柳枝辭今亡乃為補  
作

揚柳枝風吹何嫋嫋暖煙如織綠絲柔延喜樓前春色  
好臨軒奏曲送行頻梁王重有回天勲一忠之外何復  
云安得高祖太宗之業如柳新

檀來歌

汎樓船下淮浦百萬豺貅歌且舞不殺降不掠虜吾君  
弔伐真湯武爾檀來不欺汝皞皞王風樂吾土

椒蘭怨

昭皇迫東遷望絕忠臣援堂堂鴈門兵祇足速禍變帝

酣長星杯醉魄迷椒殿神龍失水机上肉惡梟啄門夜  
漏半龍興赤霧天為紅一竈三百皆皇宗唐家大業至  
此盡自古亡國未有若此之哀恫梁王歸罪將誰給奴  
輩雖誅天有在金祥殿空殺氣高賤珪白刃專相待

汜水行

五季權在兵逆順係財賄同光當宁能幾朝北雞司晨  
頌內外添都買宴物山積盡入掖庭充內費君王政荒  
優宦狎將相無辜恣誅殺蜀資百萬賊所徼縱有其能

供近渴一夫夜呼汜水東絳霄樓頭兵反攻雍陵竟墮  
所好死英武杳遂仙音空先皇有識如相問三矢雖還  
未克終

劉山人歌

劉山人黃鬚模糊衣袖褻著囊藥籠手自攜親詣宮門  
來省女將軍物色不少差其奈后方爭寵媼被驅吾父  
已兵死何物田翁來辱污椒房恩遇望遂空破帽東歸  
心痛楚長吁行念樂天歌不重生男重生女此事到吾



為妄語嗚呼五季皆天民人倫濁亂疎反親當時乖蓋  
同一氣天理何有劉山人劉山人莫悲泣伎方終老固  
賤貧却免誅夷為外戚

過宋義墓

予往年東走魏過楚上將軍宋義墓欲作詩為弔而  
未暇今日與諸生講讀至義之本末前後諸儒略不  
見論說因賦此篇以發前賢之所未發者

秦兵西來勢莫當羣雄假義尊懷王我雖三戶秦可滅

彼蟲可搏微者或莫傷將軍乘勢思一掃當時籌策誠  
難量項家父子本強暴以謀制勝非渠長義維去暴失  
之易一死竟墮貪如狼重瞳子何猖狂只知帳中奇兵  
化青血不悟鉅鹿之戰開天亡風雲慘澹蛇作龍安得  
即遇隆準翁使我目亂狐裘茸高陽酒徒號狂客醉中  
兩眼何其瞳攀鱗掉舌纔數語兩女輟洗來趨風英雄  
有時利不利俛首何限甘長終楚王店頭土一丘至今  
草棘荒煙愁我來弔古還一慨西風黃鳥聲啾啾

秋澗著書圖歌贈畫工張仁卿

張生寫出秋澗圖先生胡為此游居知余讀書樂幽寂  
況復野麋之性宜與水石俱西風蕭條秋氣餘浮雲身  
世將何如江蘿託詠太哀怨老松臥壑甘扶疎逢時不  
作棟樑用且須著論希潛夫盤盤澗曲深幾許長吞遠  
汎知攸徂百川橫障使東往細大不擇羞潢汚考槃有  
歌誰與伍山鳥山花吾友于張畫師王宰徒雲煙落紙  
何舒徐吾今屏居日已久為我作此真良謨平生未常

學學焉於此初古人尚友無老壯要欲靜泊志可明而  
遠可逾駸駸晚景幾桑榆不知此去澹泊得似畫中無  
日明神王骨相臞一丘一壑著幼輿畢此一事為成書  
此外何有於余乎此外何有於余乎

時集錄古今相  
業為調元事鑑

圮上行

邳州道中作十一月  
初四午刻書於宿遷

楚兵東來殺為嬉烈火西捲如飈馳為聚驅爵恐過慘  
天賜漢以興王師憶初推秦天下震盛氣不折將徒為  
泥中進履屈亦至不爾安制重瞳兒往年親祀濟北石

此日還賦北橋詩神龍變化不復見  
想像鬼物來陰機  
素書三卷不必怪要本老氏持其雌

飛廉館瓦研歌

癸巳六月六日病  
中作贈王冲霄

洛邑西遷漢靈泣一炬南宮三月赤  
飛廉鍛翮化青鳧  
老瓦淪胥何所得太陰凝魄祕興亡  
土花千年不敢蝕  
劉郎杳杳秋風客神鳥冥飛憶初格  
豹章爵首尾蟠蛇  
建章千門風冽冽磨礪頭角入孤園  
收斂松聲聽蕭瑟  
墨花供筆發幽光  
長日玉堂生五色  
張華博物見初心

笑泚玄泓為渠說昭陵柏城初覩汝十五年來莫渠別  
護軍紀漢明有書應劭箋形更精潔道初在邇求轉遐  
半世看書眼空緬冲霄持贈有深意澹僻憐子如任俠  
一朝入手與神會過戶不知吾屐折嗚呼三代不復見  
兩漢規模儘堪說寶藏宜與瓦礫殊隄備有人來揭篋

昭陵柏城宋仁宗陵  
也在河南鞏縣西南

七言律詩

登凌雲閣

布衣塵滿戴儒冠  
風袂來登上將壇  
棟藻雲飛朱拱溼  
檐牙霜重玉梯寒  
風煙遠勝籌邊迥  
氣勢雄吞汴水乾  
經略江淮有成算  
不須重展地圖看

登資聖閣

傑閣當年瑞靄氤  
亂餘金碧半塵昏  
豈知象教移中土  
猶揭雄名護國門  
法界冷沈梁苑月  
寶香難返汝陽魂  
傷心五嶺騰煙語  
舉世從風莫與論

過朝歌

山勢西來擁廢宮，荒煙回首接南鄘。  
緬懷藝祖初經野，忍見狂童到覆宗。  
野水作聲知客恨，幽花含露為誰容。  
千年快意商郊戰，流謗爭教有二兗。

銅臺懷古

都邑盤盤據四衝，登臨形勢覺天雄。  
歌樓暖響春風細，綺陌香銷寶氣空。  
笑著孱王承宋弊，至今姦孽擅唐終。  
憑高誰識神州恨，付與衡漳日夜東。

聞詔



灤水高呼萬歲觴  
綸章飛下紫泥香  
九天空有風雲夢  
萬國爭依日月光  
草木變衰元氣活  
乾坤開濟老陰藏  
兩都耆舊欣相告  
四十年來未省嘗

上王翰林

白衣如鵠禁闈春  
九萬曾搏北海鯤  
獨翼龍顏潛代邸  
親承雲錦織天孫  
兩朝耆德尊元老  
千古雄文說赦恩  
寂寞黃金臺下客  
詠歸心久在龍門

祇謁昭烈皇帝廟

一劍功成百戰場三年章武事堪傷力扶漢祚圖燃燼  
規取劉璋出侮亡若論託孤徒啟篡試評含泣到分香  
秋風一掬宗臣血五丈原頭落日蒼

燕城書事二首

都會盤盤控北垂當年宮闕五雲飛崢嶸寶氣沈箕尾  
慘澹陰風貯朔威審勢有人觀督亢封章無地論王畿  
荒寒照破龍山月依舊中原半落暉

朔風千里捲孤蓬斗酒難澆磊砢胸清濁滄浪知自取

蒙茸狐服竟誰從  
燕臺坐老黃金容  
甲第爭高白玉鍾  
撥土便成千尺榦  
露恩初不負崑松

望西陵

漳川北岸望西陵  
馳道東連講武城  
將略有餘開戰伐  
墓碑無謂自題評  
一棺何在彌天力  
九錫徒誇盜漢名  
千古遺墟冷煙底  
定軍山樹拂雲平

牧野道中

野人川浴振裳衣  
況接恩波沐鳳池  
莫訝出門何刺刺

須知去國自遲遲  
河橋飲餞無千騎  
文物聲名又一時  
有淚不揮離別際  
西風空送鴈行悲

上史丞相

百揆端歸一相尊  
中臺潛隱北溟鯤  
人間桃李爭時晝  
天上風雲擁戟門  
鴛鴦遇知思一顧  
家山回首惜空奔  
幸蒙翦拂長鳴去  
會有文章報至恩

直中書省

紫禁彤庭尺五天  
沈沈碧綺鎖秋煙  
鳳池波暖鏘鳴佩

翰苑才疎愧昔賢  
人世好懷能幾度  
風塵長路已三年  
綠陰好在西園樹  
辜負移牀聽晚蟬

白樓晚眺

條山東峙畫屏開  
樓外長河一線來  
簷瓦蘸波鴛鴦渚  
鏡鸞空影月臨臺  
千年事往情如昨  
滿目春傷恨未裁  
更著野花留寶曆  
女牆隨意點晴苔

洛陽懷古

重城繚繞枕邛腰  
二水交纏會洛橋  
勢即土中多漢制

錦園林苑訝隋妖山川開闔悲今昔陵谷更遷笑市朝  
萬古消沈竟何有總成閒話付漁樵

游玉泉山

山腰一徑轉雲蘿照眼平湖漲碧波形勝左蟠遼海遠  
風煙還覺玉泉多自憐俗駕來逋客急遣清樽發浩歌  
笑拂巖花醉歸去山林鍾鼎兩蹉跎

歸潛洞

眼冷朱門鶴蓋陰自開幽洞事幽尋飄蕭書劍三秦客

盤礴風雲萬里心竹澗度涼便夏永藥囟留暖愛冬深  
何時為濯長纓土丹竈茶煙共一林

至元七年庚午奉陪憲臺諸公闕下賀正口  
號

盤盤帳殿敞彤庭天仗宵嚴擁萬靈玉筍東班分列辟  
龍墀首拜認前星煙燔鼇柱霑吟袖樂泛仙音近御幘  
歲歲大酺恩例溥自慙虛薄仰皇局

司馬才卿暇日登昊天寺寶嚴捨有懷

高標直上跨蒼穹  
物外方知象教雄  
九陌市聲同曉色  
兩都喬木動秋風  
遙憐漢馬屯湘渚  
安得長書附去鴻  
寂歷村墟野煙外  
誰家簾幙夕陽紅

題張府君墳丘

子偉字行甫曾  
任判官孫二人

龍公祠下府君墳  
岡勢西來虎豹蹲  
翠琰盛傳千字誄  
青衫還有讀書孫  
喬林氣鬱雲山重  
一水春涵德澤溫  
白首故侯長健在  
緊須著力大于門

別高屯田晦之



十年冠蓋幾相逢  
邂逅燕城燕喜同  
清賞已歌梨雪白  
歸期休負牡丹紅  
千屯曉月鞭聲底  
一片田旌夕照中  
自笑欲歸歸未得  
草堂無地著盧鴻

佛狸祠

在瓜洲城

江山照眼舒清眺  
千古興亡墮眼前  
瓜步市長連野戍  
佛狸祠古慘荒煙  
柁樓看取平吳日  
父老空傳飲馬年  
此日不須開濁浪  
好風都屬往來船

送舍弟南歸穰下

壬辰十月二十日彰德相別

相思渭北常年事，遠送漳南恨別心。  
沙暖暫聯鴻鴈序，霜寒淒斷鶻鷁音。  
兩鄉健在都能幾，千里含情老更深。  
慰託此懷知懇切，不教消息到浮沈。

賦王詹丞宣賜玉杖

王諱慶，端字正甫，藁城人。

青宮宿衛舊將軍，家世今誰萬石君。  
千騎寵光承眷顧，一枝方杖表忠勤。  
靜臨春桂堂階月，暖帶紅鸞扇影雲。  
若把璠璵比良德，健於羅結更溫文。

一作前日倚毗，今有劬雲臺從此策。

高勳

癸巳清明後三日偕益津李士觀登太史臺  
客中何處散幽懷  
放眼高明恐易裁  
兼覺形神未全老  
試憑筋力共登臺  
山河繚繞陪京壯  
樓觀參差落照開  
曳杖不知雙髀困  
銅駝巷陌晚歸來

德壽殿玉方池研

理宗所御德壽殿為太  
上皇后所居殿緝熙講經殿

也硯即  
碧絲歛

玉斲坤形靈四溟  
丹書猶認壽宮名  
紛紛落墨騰蛟霧  
浙浙秋風拉瑟聲  
神物不知崑火烈  
碧絲今對玉堂卿

眼中多少興亡事白髮孤臣最愴情

當時同僚承旨留中齊學士劉東崖

侍讀趙方唐

皆宋人也

為周紫巖賦冬日牡丹

蘇州人右職出身新簽兩浙行省事中齋

索賦

翦翦江風十月霜寒梅時序見花王一枝重薦金盤瑞  
滿幄濃薰麝粉香協氣暗扶忠節壯名葩來伴紫巖芳  
故園從此恩光爛卷裏題詩半玉堂

聞友人買犀帶

聞君饒價買犀躩，侶為精神見老年。  
論品要勝華袞異，垂腰猶欠玉魚懸。  
通天即是裴公賜，素髮其如白傅顛。  
留取百錢休妄費，安排開歲置貂蟬。

寄何參政

郎山山下讀書堂，萬卷芸香綴夜光。  
贊善昔推東道主，賢參高卧北牕涼。  
林烏返哺捷為守，易水悲風劔客鄉。  
擊筑會傾高麥酒，滿壇秋草酌昭王。

贈西雲上人

系海南  
高弟

吏用公才不易逢茶煙都颺落花風登壇懸斷犀機息  
面壁傳心萬法通慧眼正來珠媚浦浮雲飛盡月當空  
虎溪公案元瀟灑會約松軒一笑同

送安參政南還汴梁

參政安公與僕定交於中統初元契濶者二十寒暑  
大德戊戌春邂逅於京師樽酒談話追憶疇昔念故  
舊之彫零感歲月之易邁情不能已者謹以唐律為  
贈既光回旆且寓愚意之所託云

黑頭蚤插侍中貂當日雲霄一羽毛忠翊殿庭稱謹密  
量吞湖海見雄豪風雲夢繞調元鼎秘奉光含切玉刀  
此去斯文應有記豐碑還擬泰山高



中州名賢文表卷二十三



欽定四庫全書

集部

中州名賢文表卷二十四

詳校官中書臣瞿照

助教臣常循覆勘

總校官庶吉士臣朱鈺

校對官編修臣盧燧

謄錄監生臣李世麟

欽定四庫全書

中州名賢文表卷二十四

明 劉昌 編

王文定公

奏議

論政事書

臣近蒙禮部符承中書省劄該憲臺欽奉聖旨召臣憚  
馳傳赴闕庭者臣憚伏自欽承明命夙夜祇懼不知所  
為意者憲臺過舉俾備顧問庶有所發明因自忖量國

家之事日有萬幾非愚下所能識然臣自中元迄於今日久叨仕進區區管窺不無一見輒敢以時務所宜先者數事昧死上聞臣聞自古創業垂統之君必定制畫法傳之子孫俾遵而守之以為長世不拔之本欽惟皇帝陛下聖文神武以有為之資膺大一統之運長策撫馭區宇民數遠邁漢唐其所渴者特治道而已然三十年間勵精為治因時制宜良法美意固已周悉今也有更張振勵講明畫一若懸象而昭布之使臣民曉然知

其法之所以豈不便哉故臣以立法定制為論治之始  
一曰議憲章以一政體傳曰法者輔治之具一日闕則  
不可君操於上永作成憲吏承於下遵為定式民曉  
其法易避而難犯若周之三典漢之九章是也今國  
家有天下六十餘年小大之法尚遠定議內而憲臺  
天子之執法外而廉司州郡之法吏是具司理之官  
而無所守之法猶有醫而無藥也至平刑議斷旋旋  
為理未免有酌量准擬之差彼此輕重之異臣愚謂

宜將已定律令頒為新法或有不通行未盡該者如累朝聖訓與中統迄今條格通行議駁叅而用之與百姓更始如是則法無二門輕重適當吏安所守民知所避而難犯天下幸甚

二曰定制度以抑奢僭夫制度者明尊卑別貴賤法天道而立人極也故古者衣服飲食輿馬屋廬皆有恒制至於庶人僕妾其禁尤嚴惟在君人者制節謹度率先化下為務何則上之動靜為人勞逸之本上之

奢儉為人富貧之源可不鑒哉欽惟皇帝陛下御極  
以來躬先儉素思復淳風如輕綺衣而貴紬繒去金  
飾而朴鞍履至衣服等物銷織鍛研之類一切禁止  
以奉行漸遠不無弛緩今也臣民衣飲踰於公侯婦  
女衣著等於貴戚以致聘財過於卿相男女不能婚  
姻正以用之無制僭越暴殄有不能供億者故物價  
不得不踴而貴錢幣不得不虛而輕上下困弊日甚  
一日假若巨室之家親屬奴隸衣飲等差若例而一

之寧不困乏臣愚以謂宜一切定奪大行禁止使民志定而不少僭越用既有度物自豐饒恐亦實楮幣殺物價之一端也

三曰節浮費以豐財用夫一世之財足周一世之用不必專豐其財去其害財者可也今國家財賦方之中統初年歲入何啻倍蓰而每歲經費終不阜贍者豈以事勝於財過有所費故也為今之計正當量入為出以過有舉作為戒除饗宗廟供乘輿給邊備賞戰

功採荒歲外如冗兵妄求浮食冗費及不在常例者  
宜檢括一切省減以豐其財財豐事勝食足氣充以  
攻則取以戰則勝以柔則服將何為而不成何求而  
不獲古之善為國者君不必富富藏於民故用雖多  
而取不竭孔子曰百姓足君孰與不足此之謂也且  
財非天來皆自民出竭澤焚林其孰禦之但力屈財  
殫非所以養民而強國也昔亡金世宗諸王有以不  
給而請告者世宗曰汝輩何騷殊不知府庫之財乃



百姓之財耳我但總而主之安敢妄費迄今稱說以  
為君人至言可不鑒哉

四曰重名爵以攬威權古人稱官爵謂之天秩王者代  
天爵人鼓舞一世使天下之人奔走為吾用者此也  
惟爵與祿不輕以付人曰賢曰材迺能得之蓋以為  
礪世磨鈍之具若得之輕則視之輕視之輕則人不  
重人不重將見君子遠小人至此必然理也惟其磨  
礪轡馭之權世主操於上不輕授人與當其材何患

氣之不振力之不竭事之不成者哉今四海一家權  
宜假借之舉日漸希闊正國家收攬威權之時如近  
年委任稍重者罔考平素即授崇品激之建功立事  
固是駕馭英雄大權苟非其人不無叨竊不安之懼  
今中外無事朝廷宜重而惜之昔有唐使職或帶相  
銜然止行見職曾無分省實權

五曰議廉司以勵庶官臣聞古之善為國者不使人有  
怠惰不振之氣若作於心而害於政苟非以德振起

之須度時宜本人情齊之以法故得小大畢力上下  
勞而衆事舉今州郡之官品流散雜既無選舉甄別  
止循常資紛紛藉藉聚散於吏部例得一官誰不因  
循苟且以歲月養資考而已欲望承流宣化趨事赴  
功卓有惟新之政亦已難矣嘗觀漢唐之馭吏也能  
者增秩賜金公卿缺則補之以表其賢否者放田里  
而不事事唐則召七品以上官集於闕庭親與訪問  
究得失而進退之然二者不過爵祿為勸爵祿極則

意滿足意滿足則怠心生亦有無如何者故持斧直指採訪黜陟等使歲相望於道而本朝之舉高出前代比者廉司之設初氣甚張中外之官悚然有改過自新之念大姦巨猾致畏懾而不自安庸人懦夫將卓爾而有所立行無幾何法禁稍寬使監視者動挺之氣不息而自斂聽從者姦弊之萌潛滋而復拏恐徒易其名而不能革州縣之故習夫刑罰崇寬固是國家美政然分別善惡以示勸懲豈得專務寬恤昔

亡金大定間尚書省奏順州軍判崔伯時受贓不枉  
法准制當削官停職世宗曰受財不至枉法以習知  
法律故也所為奸狡習與性成後復任用豈能自悛  
雖所犯止於追官非奉特旨無復錄用以致犯禁者  
鮮此先事之明驗也今風俗澆薄遇有所犯苟免無  
恥臣愚為法宜稍重以權一時其要在人法並任精  
擇官僚優加吏祿憲綱既立公道大行官有作新之  
氣吏無餽口之虞我之氣既伸彼安得不振我之政

既肅彼安敢或私所謂上行下效源清流長將見風采百倍有登攬澄清之望矣

六曰議保舉以覈名實方今親民與參佐官莫縣令經歷為重縣令迺百姓師帥師帥賢則德澤宣參署為一路紀綱紀綱振則政務舉今例出常流安取殊績臣愚以為若行品官保舉法庶得其人其法品量舉主與所保者資歷相應既皆兩可復精加磨勘無謬妄私意然後許令入狀相小大之才授繁簡之任限

以歲月

如唐制釐務出二百日者是也

課其殿最升黜舉主得人者

受知賢之賞不職者坐不當之罰舉官自然盡心受保者常恐相累如此庶立功而寡過矣其南選尤宜施用此法何則江南比至平定諒為不易凡所隸附秋毫無犯可謂仁義之師只以前省調官賄而海放行省注擬尤為濫雜侵漁掎克慘於兵凶至盜賊竊發指此為名仰賴天恩幸其無事今宜委官分揀以行此法其停革人員不至罷黜者降之邊遠邊遠見

職委有聲迹者使之內遷亦激勸一法茲蓋自漢唐五代迄於亡金皆遵而行之當時號稱得人然必須內設審官考功等職專掌其事

七曰設科舉以收人材方今名儒碩德既老且盡後生晚進既無進望例多不學州府鄉縣雖立教官講書會課祇皆虛名畧無實効以致非常之材未聞一士州郡政治苦無可稱思得大儒碩德難矣臣愚以謂不若開設選舉取驗之速也夫進士選歷代號取士



正科將相之材皆從此出前代講之熟矣理有不可廢者若限以歲月而考試之將見士爭力學人材輩出可計日而待也論者必曰今以員多闕少見行壅滯若復此舉是愈壅而滯之也臣謂不然蓋科舉之設本以覈實學而取多士清仕途而息雜流庶得將相全材為國論治道備大用也豈不愈於學校徒設汗漫而無所成乎

八曰試吏員以清政務前代取吏之法條目甚嚴如宰

相子辟舉令取充省雜終場舉人試補臺掾品官子  
孫吏員班祇閣門等人出身者試補六部令史夫令  
者明法令曰令史者通經史曰史今府州司縣應用  
一切胥吏多自帖書中來官無取材勢湏及此所習  
既凡聞見或寡欲望明刑政識大體務清弊革難矣  
臣愚以謂為今之計莫若將合歲貢吏人以吏員法  
試之中選者仍許上貢補充隨朝身役外州府郡見  
役者從廉司以校法試驗庶幾激之積漸肯學其月

請俸給亦合定奪能使得餽其口然後可責以廉何則今廉司專抑吏權察非違少有貪鄙不計養廉即按而治之是縱之竊而責以何盜之為豈理也哉

九曰恤軍民以固邦本近命新省整治以來一切事務盡從簡靜可謂不嚴而治不肅而成者也中外熙熙翕然有拭目太平之望茲蓋皇帝陛下屏去姦慝保合太和嘉靖邦本專任責成之效也然猶有當軫慮者夫為治之道政貴均一不少偏重否則必更而張

之使至公均被國家且自攻圍襄陽以來簽取軍役  
蓋四舉矣將著中物力等戶盡充軍站中間拋下上  
戶其能有幾皆貧難下戶而軍興百色所須皆仰供  
辨江南甫下遭值前省和顧和易急徵暴斂侵漁不  
法又將軍站閃下差稅不問多寡止除四兩餘者分  
酒見戶其逃亡差稅又行每歲陪納數年之間編氓  
已是靠損其小戶困苦不較可知臣以時屬方殷其  
代輸差稅宜令蠲免涵養存恤小康若一旦別有征

求易為責辦其軍站戶富者至有田畝連阡陌家資累巨萬丁對列什伍貧者日求生活有儲無甌石田無置錐者今也不辨難易一體應役又至元十一年簽充到軍役者多是近下戶計當時起遣已是生受臣愚謂俱合分揀定奪庶不致困乏逃竄有悞臨時調遣不均之弊莫此為重

十曰復常平以廣蓄積常平倉設自至元八年隨路收貯斛粟約八十餘萬今倉廩具存起運久空甚非朝

廷救荒恤民本意夫常平之法歲豐增價以糴之則  
農重穀而敦本歲荒則減價以糴之故民倚安而無  
菜色如往年定時估以平物價竟不克行殊不若常  
平之有粟也蓋低昂權在有司兼併利無專擅故也  
若復實常平倘遇凶歉出糴三二千石穀價自平楮  
弊亦復加重且勉賑濟破用軍國正儲實為古今良  
法

十一曰廣屯田以息遠餉臣聞邊儲遠餉自古未有良

法如飛輓負載賣爵贖罪引種和糴未免弊困多不能行俱未若留兵屯田為古今之長策也臣試以唐

振武事言之憲宗元和七年李絳言天德振武

今豐州等

處左右良田約四千八百頃收粟四十萬斛歲省度

支錢二十餘萬緡茲非明驗歟今振武豐州界河兩

傍除營帳百姓耕占外其餘荒閒尚多若大治屯田

自非水旱田功稍集國儲必有所濟唐陸贄所謂緣

邊土沃而久荒所收必厚又近歲山後流移戶多將

見拋地土時暫借令營屯亦是一法

富弼曾言此事

及檢括

冒占仍招募願戶者聽外邊屯已置營屯去處亦宜  
差強果為國盡心有為能臣重與檢勘其間一切可  
行未舉已行不盡者極人為而盡地力仍將迤南一  
切置屯見閑戶數併徙邊防以揀一時此急於治外  
之意也

十二曰息遠畧以撫已有臣嘗聞老子以恬淡為宗孔  
宣父戒及其在得二聖人垂教以天理當然為言非



徒設也欽惟皇帝陛下聖神文武臨御天下三十餘年昭丕天之功接千歲之統三五已來未有若斯之盛其於太祖聖武皇帝垂創之業可謂大集厥成然有其有者安務廣德者強審今之勢譬猶蓄牧大家川量谷計數已殷富正在牧圉擇人芻豢得所而已如此則牛羊茁壯日蕃而無耗不然罔恤見有又務多得將見復求者未獲則已有瘠而耗之可不惜哉伏願陛下息遠畧撫已有以恬淡為心以在得為戒

頤養聖壽配天無極此宗廟神靈四海臣民之願也  
臣又嘗觀天地之氣四時行萬物生皆自然而然又  
其升降止三萬里之中其範圍不出三十萬里之內  
餘則混淪磅礴雖聖人有置而不論者伏惟陛下憲  
天體道財成輔相功已不能殫紀尚何言而何慮哉  
十三曰感和氣以消水旱夫兵者凶器戰者危事不得  
已而用之且以強勝為戒我國家以神武戡定海宇  
日月所出沒霜露所霑墜莫不臣而主之然地廣物

衆不無孽芽其間故三十年之久十有餘舉如征大理雲南渡鄂渚平內難討賊壇取江南破襄漢駕洋海下占城定高麗問罪交州掃清遼甸皆除暴固存彼動此應不得已而用之之舉也然士卒愁苦死傷暴露邊郡困乏中外憂勞之氣不得不傷陰陽之和而致水旱之報是以聖人重之畏之故老子曰大軍之後必有凶年師之所處荆棘生焉故比年以來水旱無時霜災屢作山崩地震變出非常姦臣柄用盜

賊竊發百姓替替日趨於困臣常讀中元以來國書  
詔條未嘗不以生靈為念弃捐細故講信修睦以用  
兵為重此堯舜好生之德禹湯克寬不自滿假之仁  
也願陛下躬體玄默頤養聖壽與天無極以初元之  
心為心以恬澹之慮為慮為民祈天請命災害不生  
禍亂不作使黎庶知其無好兵之心天地鬼神諒其  
不得已之意庶幾天回哀眷易乖戾而為和平變荒  
歉而為豐稔歛時五福敷錫庶民咸躋仁壽之域天

下幸甚

十四曰崇教化以厚風俗自昔風俗美好由禮義所生  
今也禮義既衰故日趨於薄一法出則衆姦作一令  
下則百詐起何則民所欲而生者歲不加益我過為  
之求者日有所增所謂救生而不贍奚暇治禮義哉  
有司釋此不念每以厚風俗為務如孝行復役節婦  
有旌議婚姻立學師表淑慝忠臣義士歲有常秩之  
類非不家至戶曉然終無分寸之効者徒文具虛名

而已夫天下之事有本有末知所先後則教立而化  
行臣愚以為風化之行莫國家若先以四教為本曰  
仁以養之義以取之禮以安之信以行之何為仁父  
愛子育懷生樂業溫飫以養其心何為義輕徭薄賦  
取斂合宜寬裕以暢其氣何為禮上下有分毋妄侵  
辱誅責以當其功罪何為信發號施令一出不易忱  
誠以明其約束是也而前政者謂桑葛也曾不務此專以  
威虐肆心督責為令取辦一時流毒四海不知陵遲

偏諛有不可救藥至於今為厲者如逋負差徭有已  
蠲未蠲者貧難軍人有已聞未聞者民出祇應不蒙  
撥降反復償其不應民辦和買雖蒙官還曾何敷其  
元價杖刑重責不上大夫崇卑之品曾不少聞悉被  
戮辱夫如是將何以責民心之近厚風俗之淳粹者  
哉惟其四者本立而天下悚然有忠厚廉恥之心而  
後敦之以禮讓謹之以庠序觀之以鄉飲教之以冠  
婚喪祭民將目擊而心諭安行而有得二三大臣匡

直輔翼於上時從而振德之孰有子遺其親臣後其  
君者哉所謂父子有親君臣有義不曰風恬俗美將  
安歸乎臣憚草茅一介遭遇明時違遠闕廷八年於  
茲雖越在草野乃心未嘗一日不在王室今復蒙被  
寵召拔起於泥塗之中犬馬之力思欲報効而愧其  
孱弱不材然愚衷內激情有不能已者干犯天威罪  
在萬死伏惟少寬鈇鉞示有可取使四方大賢大德  
之士聞之曰如臣者且蒙採擇將詭詭而來皆為陛



下用矣臣不勝俯伏待罪憂恐之至臣憚昧死再拜  
謹言

貢舉議

貢舉人材肇自唐虞而法備於周漢興乃用孝廉秀才  
等科策以經術時務以州郡大小限其歲貢之數以賞  
罰責長吏極其人材之精猶古貢士法也歷魏至於後  
周中間因時更革固為不一要之不出漢制之舊迨隋  
始設進士科目試以程文時勢好尚有不得不然者至

唐有明經進士等科既明一經復試程文對策中者雖鮮號稱得人至有龍虎將相之目其明經立法膚淺易於取中當時亦不甚重又別設制科以待天下非常之士故前宋易明經為經義其賦義法度嚴備考較公當至亡金極矣後世有不可廢者然論程文者謂學出剽竊不根經史又士子投牒自售行誼蔑聞廉恥道喪甚非三代貢士之法伏遇聖天子臨御之初方繼體守文以設科取士為切若止用先皇帝已定格法與時適宜

可舉而行如邁隆前代創為新制可不詳思揣其本末酌古今而論之惟古貢士率從學而出後世不詢經行徒採虛譽因循薦舉徂為私恩不顧公道此最不可者也莫若取唐楊綰宋朱熹等議叅而用之可行於今綰之法曰令州郡察其孝友信義而通經學者州府試通所習經業貢於禮部問經義十條對時務策三道皆通為上第其經義通八策通二為中第其論語孝經孟子兼為一經熹之議曰分諸經史如易詩書周禮二戴禮

經春秋三傳各為一科將大學中庸論孟分為四科並  
附已上大經逐年通試及廷試對策兼用經史斷以已  
意以明時務得失愚謂為今之計宜先選教官定以明  
經史為所習科目以州郡大小限其生徒揀俊秀無玷  
汚者充員數以生徒員數限歲貢人數期以歲月使盡  
修習之道然後州郡官察行考學極其精當貢於禮部  
經試經義作一場史試議論作一場題目止於  
三史內出廷試策  
兼用經史斷以已意以明時務如是則士無不通之經

不習之史進退用舍一出於學既復古道且革累世虛  
文妄舉之弊必取實學適用之效豈不偉哉外據詩賦  
立科既久習之者衆亦不宜驟停經史實學既盛彼自  
絀矣翰林學士王惲謹議

記序

殷太師廟重建外門記

廟有外門舊矣金泰和四年節度使孟公鑄易而新之  
近代以來廢撤不復者蓋三紀焉維皇朝至元元年郡

侯渤海王復命汲縣令葛祐作新太師之祠奉明詔而  
緝廢典也越明年春二月神宇甫完移治令下逮夏五  
月郡人韓澍來令茲邑奠謁祠下顧瞻臺門未克完具  
殆無以稱新宮而揭虔敬明年秋七月迺經始焉順歲  
成而樂民用也九月初吉告成厥功輪奐奐塏神遊敞  
然風馬雲車肅焉來臨左林右泉奕奕動色既而主縣  
簿高顯洎其屬願以事文諸廟石遂再拜請書於憚憚  
曰太師之墓在衛境聖蹟也按祭秩常祀也自殷迄今

二千有餘歲矣神之所以凜然如生血食不絕者豈非忠義之氣粹而為喬嶽融而為列星窮天地亘萬古作大賢為民極故也孔子稱殷有三仁焉蓋至誠惻怛之心其揆一也太師之進諫不去箕子之法授聖也太師之殺身成仁微子之志存宗也前代以二賢配饗廟庭亦見夫顯異尊崇之禮宜矣然一門之役不可不謂全功重嘉令之為縣民安政簡而復致敬恭於明神繼成前功可謂能也已故詳書本末以俟來哲至元丁卯秋

九月重九日謹記

孔履記

孔子没千有八百餘歲小子憚獲拜履基於先進趙公  
學舍吁可敬也履制極古長尺有二寸其圈以絲藉則  
以象為之紋作古方花角結駢羅紕絡如畫不可端倪  
厥首几几似圓而方狀若物鉤勢欲上達循口有衣如  
罽可相掩覆傍綴繩鉤長約數寸殆欲拘縛以斂口哆  
環脣之周中貫縷紉疊踵之后辮結方舒擯鼻穿徹色



蒼艾無光泉之纖厄者遠弊絲之堅凝者不變也於是  
拂拭睇眎起敬起愛恍如升君子之堂仰高風攀逸駕  
而聆足音之跲然也若夫履者禮也君子所履小人所  
視况吾夫子踐履之物哉吾儕小人可不敬而視之且  
夫子相魯七日誅卯也於兩觀之下如由賜之徒尚愕  
然而驚况魯人乎然視其所履其詳可得而考也夾谷  
之會齊以萊兵劫公孔子履階而上不盡一等是履也  
凝然山立兵却魯張其無嚴諸侯之勇可得而見也然

後退而閒居從容中道與三千之徒翩翩於洙泗之間  
接武於杏壇之上其素履之往坦坦幽人之貞可得而  
觀也俾後之君臣父子兄弟夫婦順而履之者昌捨而  
違之者亡宜乎吾夫子萬世之下凝旒被袞履帝位而  
不疚其道光明者焉嗚呼當崇奉者聖人之功也當踐  
履者聖人之跡也苟知其功而不踐其跡與嗜古物為  
耳目之玩者等矣是誠不可不知其所當履也中統三  
年夏五月同宣撫徐世隆都司劉郁幽陵張著觀汲郡

王暉拜手稽首而為之記

新井記

有銘

水之滋人至矣予城居三十年口衆而無井亦一苦也  
蓋飲食酒茗之用日不暇數十斛率以僕奴遠汲取足  
誠可憫也中統四年夏六月朔召井工鑿井於舍南隙  
地告成於是月上旬之戊午凡用錢布四千五百役傭  
三十六甃甃三千二百其深四尋有二尺既汲果食冽  
而多泉味之莫餘井若也且夫汲之為郡一啜會也吾

聞生聚繁夥之地水率鹹苦井而得美泉者百不一二  
數何則腐濺滲漉之餘故也予生也多疾鹹苦之味尤  
所禁忌今新泉若是而甘且冽天其或者湔浣我心肺  
滌濯我五臟沛然助往來生生之資而供無窮之用也  
是宜銘銘曰

四年季夏日戊午鑿井得泉甘勝乳古云飲之疾可愈  
朝來汲引已堪觀金沙離離流百股一泓寒碧蒼煙吐  
黑知灣濼滌水府劇郡之水率斥鹵此泉扶衰殆天與

我嬰重潔繙修組尚飲來者無窮數

遊王官谷記

山之與水相胥而後勝山非水則石悴而雲枯水非山則勢夷而氣泊二者雖具得其人而後名中條山王官谷其萃美之尤者也山闔首河曲連亘北驚為雷首為栖巖為萬固運肘而東為五老又東而得王官谷谷漢故壘名有唐司空表聖之別業至今遺構休休亭在焉至元甲戌夏六月予以檢括收田會虞已而奔命旬暇

取道於虞王官諸峰指顧東邁後八日因恙小休暑雨  
向霽遐想風煙晴逸雲上遂幡然來游始自固氏西南  
行約四五里抵山門歷磴平坦無顛頓推挽之勞不百  
許步已入山堂隩中矣其窈而曲深而容垂蘿灌木磐  
石美蔭草香而土肥環磨疊嶂碧壺瑤甕濃淡覆露內  
曠而外掩無擁遏薄愠之氣蓋谷由中高狀作層陞勢  
相覆壓耐辱而翳其下方者是也東西兩山曰壺門夕  
陽青壁矗然正色如削中峰曰天柱秀拔特起如鼇鼻

噓空高齧雲表不與衆峰聯絡真奇觀也峰半有石突  
然曰落鶴臺又西有石拱立曰雙人左右斷崖水作瀑  
流下瀉如仙人解佩天紳未收西則泉脈出縮以乾溢  
為度東則飛灑噴薄陰壑恒雨砰崖激石下注幽澗是  
謂貽溪者是也山藉以潤人仰以清物滋以榮也王子  
於是斂衽薦茗謁司空祠下退觀休休亭諸詩既高公之  
名節且說谷之深秀也青鞋竹杖扶掖上征抵天柱峰  
足望東崑瀑布礧礧三詔亭上因留宿焉時月出山豁

萬籟沉寂涼露洗空失暑所在青嶂瑤光非復塵世其  
東溪水聲如遠鼓齠齠隱動林壑顧謂兒子濡曰此山  
靈張樂喜其來而作子氣也深夜久聞毛髮森豎山人  
李珣出司空一鳴集相與披讀於露幌風簷之際顧瞻  
林影如見須眉乃酌水再酌乞靈於公詠休休之歌思  
考槃之樂安得黃金買堪乘之鶴追仙遊於寥廓也邪  
不然掃江山之筆吸撐霆之氣貯濯詩脾以增益其未  
至庶幾列名於王駕李生之次亦所願也日旣昃徘徊



久之出山林霏煙翠漠然四合回望谷口無復所見庚  
伏中旬后三日共溪雲隱記

西山經行記

至元乙亥秋七月被藩府檄偕來伴盧君採文石於晉  
丙申如襄陵董治厥事館許氏東堂八月庚子次西梁  
質明致祭黃崖山下遂命工即役借榻普照僧舍凡再  
宿有以義成石為言者壬寅馬北首旁山行入臨汾界  
過侯氏四水等峪踰山尾得王莊峪峪口敞豁夷衍北

連白陵咎脚既夕宿龍子祠南晉掌里癸卯下井峪渡  
麻柵澗自獅子鼻登山越石門是為姑峪西山諸峪凡  
一百八處下井王莊實為之要蓋南達吉鄉北走紫川  
道也前臨浩岸觀陰定關關形峽束若石門然僅通人  
過想夫秋潦澮汾羣壑來注掀騰勃怒萬馬東駛遽阨  
茲口激而為飛流銀濤雪浪百丈湍瀉亦壯觀也躡澗  
西騫歷馬蹄纏山雨奄至且作且止指望仙臺眺玉女  
樓望生馬壇頂諸峰煙霏翠濕空濛無際磳磳縈紆盤

十有八折抵神居洞下洞腹寬肆隆穹巉嚴仰視欲墜  
後有竅透邃山之噫氣穴也遂解衣盤礴憇洞閣上尋  
復開霽山紅澗碧景氣爛漫涼風吹面自遠而至煩襟  
翛然如夢仙府雖遇四子於汾水之陽不足以喻其樂  
也因留題壁間且辯其誕少焉游太一洞觀陰躄玉柱  
蓋石鍾乳也稍西鷓馬鞍嶺上弱羊坂坂長約七八里  
極峻折艱於登陟馬力不能勝抵暮宿西陶謝氏林屋  
甲辰由鄭谷入義成分循澗槽西行逕嶮狹草木蒙茂

步履錯迂過水磴折而東北上磴嶺視石之所在石陞  
砌覆壓隱山之半腹玄質白章又有三其色若雲然者  
尤秀潤奇特降橫崗石溜間得枯枿一株矯如龍騰奇  
崛可愛於是按行澗道眎輦運所經西東入深峽亂澗  
水峽形曲折中藏堂隍其根足沙水奇曲似口似圈似  
窪呀焉而頤張突焉而角出者不可勝記兩崖峻削蕪  
蕪壁立高入雲表大石阜如齟齬左右勢犖确殆不能  
騎造愈深而峽愈奇又東行十餘里碧崖橫截水淥瀉

石甕中鏘然如環珮鳴兩山間峻絕不可越矣遂自南  
脚嶺攀援北上峰回路轉行可六七里至岡東陶山冢  
乙巳復自羊坂東降取姑射北道過龍堂澗望仙門謁  
王母洞道人致酒山閣以軟脚仍飲余浮大白者三世  
傳北山中復有玉蓮古洞下與此穴暗相通連旁有水  
泉曰灑錢名者事涉誕怪不復紀遂由側嶺白石溜下  
叅峪抵西段里午飯郭氏田舍日昃還府吁天壤間山  
水佳處惟幽人勝士得徜徉其間與顥氣造物俱游而

共樂不圖官守急遽中而獲茲遊雖不能窮幽極勝弄  
雲煙而狎魚鳥亦非常之舉也歸筆所覩以志且見夫  
因事機攄煩滯而不為徒然也

平陽府臨汾縣新解記

平陽當河汾間為鉅鎮屬邑五十餘城臨汾劇而最要  
經界纔百里占籍者幾萬五千戶凡丘賦之重徭役之  
煩十常居其二而風聲氣習勤儉果譎宛然雜唐晉餘  
俗惟其物浩壤狹且不相能故人囂於訟必直曲迺已

聽約束俟審辨者動填里閉縣舊署在府右廂康寧坊  
之南城易代來為工人氏豪據有司假老屋隙舍寓理  
曹務一歲間輒三五易處簿書儀具全集委積焚不可  
殫奔趣執事者當夏熾冬冽赭汗僵立尤實艱苦前政  
狃故常盼瓜代日復一日漫不加省庶幾赫令尹之威  
具眎瞻之嫩清承宣風化之源其惟艱哉逮今縣監某  
洎尹某稔其如是適時和訟理嚮化有漸迺以其故詢  
諸衆僉曰念茲在茲竊有年矣第率先無自訖于今吧

吧也既度其人之樂所遂經辨焉應直得景行里次氏  
之故第凡成室一十有五楹畧不加易其來如歸廳事  
適中吏舍兩列彤闕前啟衡達里達於是遠湫溢處高  
明委蛇安舒各有攸叙中外竦然大易觀仰既而史亢  
淵曰其興滯易弊之勞趨事樂成之懇公倡私應共濟  
厥美匪劓書珉石代而縣者烏能究根據而見經始贄  
禮幣來謁文予以歷官內外固知天下之治在於宰相  
師帥得人而已佐天子理百官發號施令以遂物宜者



宰相也推君治宅民生供事取決會歸有極撫字百里  
間者師帥也是則宰相與師帥勢雖霄壤以本末體要  
而言實相須成化耳故前代選重其人眷東於清流冊  
授於軒陛疏名殿屏蓋繇是也今國家條章具舉百度  
惟貞顓任責成垂寄殊切作縣者苟非恪勤官守推忠  
及物何以稱經緯相需之望今一縣之署置固匪政之  
大者類能若是尚何患仕之不優俗之弗易責罔塞而  
績用不章於時哉予特喜縣僚屬達於從政有志於民

得春秋憫雨之義故以所繫重者告焉幸來者毋忽至  
元丙子三月日記

蘭亭石刻記

蘇門盧君茂之得玉色碑石中斷墜酒壚間偶見眎之  
乃禊飲序也即懇求得之予自穉年留心翰墨閱是本  
無慮十數此帖極清勁有神而不龐雜與定武石本畧  
同其背有勅書字塗以黃金光彩尚煥下復刻祁公字  
二豈裕陵賜宰相衍家物也嘗謂二王墨妙雖片言隻

字如寸珠尺璧見者皆當寶惜不可使混泥沙今一旦  
為吾所遇免夫淋漓啣蝕委弃劇滅之厄果神物護持  
時有授受然耶異時歸來當臨溪之亭位置壁間板長  
吏齋新例榜其亭曰右軍且讓鄒賢曰此乃吾王氏真  
行之祖也庶幾有樞衣而請益者其於奎璧兩間不無  
煌煌者焉但未知在幾年後耳又諺云室無滯貨不為  
潤屋矧吾儕以多文為富乎然物之堅者莫金石若也  
茲刻也豈敢保其必壽抑不敢矜其長為已有特記焉

以付子孺庶王氏來者能弓而箕之是所謂薪有盡而  
火無窮之傳也十年歲在癸未夏五月十七日謹記

中州名賢文表卷二十四